

E faavae se faaleleiga i lo tatou ta'utino o tatou vaivaiga: o se lesona o le malaia i Kalaiesetete

Levi Tavita

O le tasi o mataupu na laualuga i manatu i le tula'i
mai o le faalavelave i Kalaiesetete, e le fou i le faafofoga.

Faailogalanu.

Ae pau lona, o le faailogalanu o le to'atasi. Segilā i le
kalama.

E to'atele e manatu sa tatau ona pelulale le faava'a o
le talanoaga.

Tatou te amene o se vaiaso tofotofo i le tala o Niu
Sila, i le va fealoa'i o ituaiga, aofa'ia i le faatusa a le
palemia, Ardern, o se tasi aso pogisa i lona tala
faasolopito.

E tasi se mea na ou apoina mai i se faasoa sa fai ma
nisi o pa'aga a'oga i Kalaiesetete nei, e faatatau i le
tuleiga a le palemia e faapea, “e le o matou lea.”

Na autasi le fono, e le sa'o atoa sea lafoga. Auā e leai
se mea e tupu i se pa'usisi, e tutupu mea i faavaa ma
sootaga o mea; e le o le mea na tupu, a o le agaga na
faatupuina e sili lona mata'utia. O le fesili pe se agaga
mai fea, o le tali o le agaga o loo tausia ma faafailele i
ona lava lotoifale. I lenei faalavelave, o le faailogalanu.

E le pine ua oso le ta'ita'i apo le gagana e masani ai ta'ita'i i aso faapenei, e puipui ma ufiufi le igoa ta'uleleia o le atunuu. E faapena foi le gagana sa lagonaina i tautua a le 'aufaasalalau, o le puipui ma le ufiufi. Tuua'i le leaga i le to'atasi. Faasino le lima i le tua'oi—Ausetalia.

Lea sa ta'utino ma le le 'alo e se tasi o matai Samoa, Leaupepe Peta Karalus, i le gagana Peretania, "Some people say, This is not us. But I say this is us, We just don't go out and shoot people with guns when we don't like the look of them. Instead, we use walls, fences, policies, police, silence, violence to exclude and control."

I la matou faasoa sa talatala ai aafiaga o sui ta'itasi e tusa i le mataupu. E iai se teine Lalotoga e faailoga ese i lana galuega ona o lona igoa, se polofesa Pasefika e faailoga ese ona o lona lanu ma le faasinomaga, na siligia ma le le iloa e se isi polofesa papalagi, pe o ia o se leoleo lotoā (security guard).

O ni faata'ita'iga ia se lua i le lasi o tala a o tatou tagata, i uiga ma aga faailogalanu o loo fesaga'i ai i aso ta'itasi. Ua mautu ni ata i le mafaufau o galuega ma tulaga e faasino tatou i ai. Ma faapea foi ona fatu ai manatu ma upu ma amioga e faaali mai.

Ae le ta'ua a tatou fanau a'oga o loo feagai foi ma ia amioga i totonu o a'oga.

I se su'esu'ega i fanau, e molimau ai i le iai ma le mautu o lea amio i totonu o lotoa a'oga. Le faasi'ugutua ma le taufaifai, le manatu maualalo i fanau e ese mai o latou foliga ma talitonuga. E le pine e tali atu i latou, e le moni le upu a le palemia.

Ae sili ona faamomoiloto tala i nisi o e na maumau le soifua. E iai le tamā 70 tausaga mai Afghanistan, 20 tausaga o nofo i Niu Sila, sola mai i taua ma sauaga, o ia na ofo alofa atu i le faaoosala, 'hello brother', ae tali mai i le pulufana. O nisi e iloga tomai ma ua loa le

tautua i lenei atunuu. E iai se foma'i, se pailate. Le tala i se alii mai Fiti na afea le taulaga ae maliu ai. O le tala a se foma'i i lona le lavatia faatino lona tiute i le ootia, a o togafiti se teine 4 tausaga na manu'a leaga. O se tasi tina ua leai se to'alua, oti le tasi o lana masaga tama, a o loo manu'a le isi.

Ina ua tupu le faalavelave na vave ona tu mai i lo'u mafaufau le ata o se aiga Muselemi i Aukilani, o lo matou tua'oi; e masani ona tufa mai i aso o le latou anapogi o le Ramatana. O ni mea'ai e le masani ai, ae naunau mai lava matou te tofoina auā o se matai'ai a i latou.

O la latou aapa mai lea, ia talia i latou o ni tagata ese; ui foi o i matou o ni tagata fāi mai i lenei atunuu. Ua maua ai se sootaga, e le i se lotu poo se aganuu a o le alofa faaletagata.

Ua tatou tofo foi tatou i le te'ena mai e mafua i le faailogalanu, lea ua molia i lona o'oga i Kalaiesetete, i le laau a le faaoosala.

E mafai ona fau ni tulafono e taofiofi ai, e pei o lea ua pasia e vaoia ai ituaiga fana ia sa fa'aaoga e le fasioti tagata, ae le malu ai se tasi; e malu le va nonofo i le alofa e faavae i le aapa atu. E le faatali ina se'i aapa mai.

E faatusa le faailogalanu i se faama'i o le loto ma le mafaufau. E fafaga e faalogona faaletagata e iai le ita, fefe, fuā ma le matau'a. E faavae ai ni mau faailoga tagata e pei o na sa tala'iina e Hitler ma isi. E leai se tagata e ola mai ma se amio faailogalanu, ta'utino Mandela, a o se mea na te a'oa'o mai i ona matua poo se isi.

E mafua ai le mau, o le tali i le faailogalanu o le a'oga—ola a'oa'oina. O le lava o le a'oga, e maua ai le loto fetala'i ma le agaga faapalepale, le naunauga e talia isi tagata e ese mai ia i tatou. Ae le na o le a'oga i le atamai, ae atagia foi le matua i le faaleagaga. E le na

o le suiga o le tau le mataupu taua, a o le suiga o le loto ma le mafaufau e tatau foi ona a'oa'o.

Ua tatau ai ona a'oa'o le faailogalanu i potua'oga ia malamalama le fanau. Ona mautali lea i lenei lu'itau ma sauniuni foi e tali atu i ai. E le i le tulafono a Mose o le 'mata i le mata' ae i auala o le filemu.

I la'u matau na o a'u, e leai se fetu na sili le pupula i lo lena o tagata Muselemi a lenei atunuu, i le taimi o le faalavelave. I le agaga autasi o le agaaloa [aroha] ua latou faamagalo atu ai i le na agaleaga. Ua valaau le Isil mo se tauimasui, talosia e malo le agaga faamagalo.

E moni Leaupepe, o lenei mea ua tupu e le na o lē na faia le faasalaga, a o tatou uma lava. E le sa'o atoatoa ai le lafoga a le ta'ita'i, auā o le sese o le to'atasi o le lape lena o le si'osi'omaga na faafaileleina, aemaise i latou na fagina le mafaufau i manatu sese ma auala a le fili.

E mafai ona maua le fofu pe a tatou talia faatasi lo tatou faia'ina ma le 'aule mafaia.

O loo feagai pea lenei aai o Kalaiesetete ma se ufiufi o le ao pogisa e faamalumalu, ae pei o le upu, soo se ao e iai sona laina siliva. E tupu le faamoemoe.

O le tatalo a le 'aufai tatalo, ia avea le malaia o se faatupu moemoe fou i loto ma finagalo, ia uluulumatafolau pei se matagi agi malie, e tineia ma solipala ai le faailogalanu.